

1571 quibus christiane res premebantur, tribueret; hisce malis ab eximia sua prudentia auxilium peteret, ut, amputatis controuersis, omnes in commune bonum consulerent. Hæc Formento mandabantur. Ceterum biduo post, ne ex scribæ missione earum rerum aucta fama vires acquireret, Senatus iussa ut legati perficerent, decernitur. Quibus Pontifex, se prorsus eadem, qua Senatus, mente esse, nihil antiquius concordie nexu sibi fore, respondet: verum firmum quoque, atque immotum animo suo insidere, ut sartam, tectamque suam dignitatem, atque auctoritatem tueretur, quam si quis ulla in re labefactare aut ledere velit, nihil ad eam conservandam prætermisuram, mortem quoque ipsam, si occasio posceret, appetiturum. His de causis nihil de militum delectu in pontificiis ditionibus habendo impetrari poterat; atque seuera adeo edicta Pius pronunciari iusserat, ut præfectos quosdam, qui, facultate non impetrata, Reipublicæ nomine milites conscripserant, in vincula trudi præciperet; Agefilaumque Monaldeschium, exilio ac bonorum publicatione mulctatum, ægre a Senatu sæpius rogatus, revocaverit.

Veneti stipendia militibus augēt.

Hieronymus Vēdramenus, & Joannes Contarenus curatores classis eliguntur.

Aliud præterea malum in militiam irrepsit, ut plerique præfecti, ficta pro veris nomina inducentes, pessimo exemplo publica stipendia raperent: adeoque hæc pestis increverat, ut multa oppida debito militum præsidio exuta invenirentur. Huic incommodo obviam eundum Patres rati, ut ejus rei criminis nonnulli Venetias captivi mitterentur, iussere. Torquato Hierosolymitano equiti, qui gravissime ea in re deliquerat, medio foro, inter geminas columnas cervices abscissæ. Ceterum, ut militibus consuleretur, tres scutatos nummos singulis mensibus privato militi persolvi, cum antea sex ac triginta dierum spatium, *ducat*, ut ajunt, tribus tantum mererent: decem honoraria stipendia quolibet mense præfectis tribui, decretum: & ne qua fraus inesset, bini ad eam rem Curatores (*Commissarios* vulgo dicunt) in classem sunt designati, Hieronymus Vendramenus, Joannes Contarenus, e Joppensum Comitum familia, qui tunc triremis præfecti munus obibat. Haud absimilis in remigum delectu habendo difficultas aderat, cum agrestium plerique prædurum, ac grave servitium perosi, solum vertendo in alienas regiones migrarent.